


Nel ricordo di un padre... (Vernacolo Catanzarese)

Data: 8 luglio 2019 | Autore: Salvatore Procopio



CATANZARO, 07 AGOSTO -C'è sunnu compleanni cchi quando arrivanu... ti vena nu nudu alla gola e... l'occhi n'cumincianu ma diventanu lucidi, e si gonfianu a tala puntu... finu a cchi na lacrima nescia fhora... e si n'da schinda ammenzu na rughiceddha da faccia tua

C'è sunnu jorni cchi quando arrivanu... ti ricordanu certi momenti... cchi su fissati n'to cerbeddhu toi... comu fannu i radici e n'alberu menthra sta criscendu...

C'è sunnu attimi chi... quando cacci e dintrha a borzetta... o do portafogghi na fotografia da tua... abbrazzatu cu pathrittha, pemma a fai vidira ad ancunu... cci fai capiscira... ca tanti cosi non ci potisti dira, ma cchi volivi ma ci dici... primu tra tutti... ca ci volivi bena...

E allora penzu e dicu...

Cu esta chiddha perzuna, cchi...

on'ava na fotografia do pathra soi...

subba u tavulu do soggiornu da casa, cchi quando a guarda... quasi comu ppe rispettu... cci cacci a purberata da parta e subba...

o... megghiu ancora attaccata alla paretta do corridoio e puru ca passi mille voti, l'addirizzi sempra nu pochiceddhu, comu si ci fussera ancunu chi a stortigghia apposta...

o... subba a scrivania do lavoru, cchi ogni vota cchi c'incroci u sguardu, ti si vagnanu l'occhi e... finisti e lavorara...

o... n'ta machina... sutta l'aletta do parasula, cchi quandu a vasci... ca a sfera do sula ti n'ceca l'occhi... tai e fermara ca non vidi cchiu a strata, ppe i lacrimi cchi cumincianu ma nescianu...

o... dintra u cora toi... n'te chiddhu anguleddhu, duva teni stipati certi emozioni e certi ricordi... accusì gelosamenta... cchi sulu ma senti pronunciara ad ancunu, u nomu e pathrittha... ti si ferma u mundu e tuttu chiddhu cchi c'hai n'tornu a tia... e tornandu arretu ccu a memoria e na vrancata d'anni... para ca chiddhi pochi attimi cchi passaru... diventarù seculi...

Nu pathra cchi si po' definira tala, d'hera a vita sua ppe nu figghiolu e cci perdunera puru u sbagliu cchiu randa... e... chissà quanti voti avera volutu ma ti fa nescira o ricogghjira quandu volivi tu... ppecchi magari l'amici toi facianu accusì... ma iddhu on u potia fara, forza ppecchi iddhu pensava e guardava luntanu... pensava a quandu tu nu jornu averi diventatu pathra o mamma... e ccu i figghioli toi... magari t'averi cumpurtatu comu ficia iddhu na vita prima...

Cu u sapa quanti voti averi volutu, patrittha ppeppema t'abbrazza e ma ti dicia ca ti vo bena e ca si a vita sua... e ojia... quandu vidhi na fotografia da sua... ti penti ca magari on un facisti tu...

ma tu u sai ca iddhu... avia nu cora accusi randa, ca si sulu potia parrara, t'avera dittu na jumara e paroli.

Cui nu patra... sapa ca ci respunda, si vai e ci fai na visita... non capiscia a fortuna cchi ava... e non c'esta cosa cchiu bella... prima ma esta troppu tardi... ma ti l'abbrazzi e ma cci dici... Papà... ti vogghiu bena.

(Dedicata)

Salvatore Procopio